


# In de buize

*een verhael uut:*



*Veur groep drie en vier  
mit verwarkingsmateriaol*

## In de buize

Harrie Haeze, Knienegien Snuffel, Ties Stiekelvarken en Sloompjen Slakke doen votkroepertien. Een grote rood-mit-witte-stippen-poddestoel is et honk.

Knienegien Snuffel is 'm. Snuffel het de votkroepplakkies van Ties en Sloompjen binnen de kotste keren ontdekt.

Mar now staot et knienekoppjen op onweer, want hi'j is al ik weet niet hoe lange an 't zuken naor Harrie Haeze.

Snuffel foetert dan ok van: 'Ik bin et zuken naor die haeze strontzat!' En dus raost hi'j: 'Harrie Haeze, ik geef et op! Kom mar te veurschien!'

Mar wie d'r komt, gien Harrie Haeze!

'Ik zag him naor die baank toe draeven!' zegt Ties Stiekelvarken.

'Daor heb ik al een peer keer keken, man,' zegt Snuffel.

'Kom mit! Nog een keer zuken. Drie zien altied meer as iene!' mient Sloompjen Slakke.

Ze vienen Harrie Haeze niet.

Wel zien ze bi'j de baank een buize! En die buize staot rechtop in de grond. Hi'j stikt d'r nog een aentien bovenuut.

'Jonges!' schrikt Ties Stiekelvarken, 'Harrie zal toch zeker niet in die ...?'



‘Harrie!’ roept Sloompjen Slakke, ‘Harrie, zit ie soms in disse buize?’

‘Ja,’ klinkt et vanuut de diepte. ‘Ik stao d’r op de kop in!’ goelt et haesien.

‘En ik zit hielemaole klem! Help mi’j asjebliedt!’

Knienegien Snuffel ligt al op de boek veur de buize en stikt iene van zien veurpoties d’r in.

‘Te kot, Harrie,’ fluustert Snuffel. ‘Mien pote is te kot.  
Ik kan d’r potdorie niet bi’j!’

‘Mar ik moet d’r uut!’ raost Harrie bange. ‘Ik kan hier  
toch niet ... Dan gao ik dood!’

‘Zo veer is ’t nog lange niet, heur,’ sust Sloompjen  
Slakke.

‘En zo veer komt et ok niet!’ mient Ties Stiekelvarken.

‘Zeker weten van niet,’ zegt Snuffel, ‘want ik gao  
hulpe haelen!’

Knienegien Snuffel gef t slakkien en et  
stiekelvarkentien opdracht om bi’j Harrie te blieven.  
Ze moe’n et haesien now en dan wat moed in praoten.  
De knien zels sprint vot!

Nao een posien heuren de achterbliers: ‘Wi’j gaon  
lanen!’

Verbaosd kieken de slakke en et stiekelvarkentien  
omhogens.

Daor vligt Rikkie Reiger!

Mit Knienegien Snuffel op zien rogge laant Rikkie vlak  
naost de buize mit Harrie Haeze d’r in.

Onder gejuich en geklap van Sloompjen, Ties en  
Snuffel trekt de reiger et haesien hiel veurzichtig de  
nauwe buize uut.

Gelokkig!

Mar as de vrunties et haezekoppjen zien, schrikken ze!  
Bulten op et veurheufd, blauwe plakken op 'e wangen  
en een schaefwond op 'e kin.

Daor komt bi'j dat Harrie de traonen over de wangen  
biggelen!

'Dot et zeer?' vragt Sloompjen Slakke bezorgd.

'Nee man! Zo bliede bin ik da'k uut die rotbuize bin!'  
lacht Harrie deur zien traonen henne.

'Daank je, Rikkie... Waor is Rikkie? Waor is mien  
redder?!

Die, die is in gien velden of wegen meer te bekennen!

*(Uut: De Hollebomebos, Herma Stroetinga en Trudy Kramer, 2007)*

## Tien vragen

1. Welk spelletje wordt bedoeld met 'votkroepertien'?
2. Is een 'stiekelvarken' een egel, olifant of walvis?
3. Hoe heet de haas?
4. Kunnen de andere dieren de haas wel vinden?
5. Wat is er met Harrie gebeurd?
6. Is het pootje van Snuffel wel lang genoeg om Harrie te redden?
7. Wat gaat Snuffel dan doen?
8. Welke vogel trekt Harrie uit de buis en hoe heet hij?
9. Waarvan schrikken de vriendjes van Harrie als hij uit de buis komt?
10. Harrie moet huilen; maar is Harrie wel verdrietig?

## Opdracht

Maak een tekening van Harrie vlak nadat hij uit de buis gekomen is.

*Deze lesbrieff werd samengesteld door Sietske Bloemhoff, Stellingwarver Schrieversronte, (info@stellingwarfs.nl / www.stellingwarver-schrieversronte.nl)*